



DEO OPTIMO MAX.

UNI ET TRINO,

VIRGINI DEIPARÆ, ET S. LUCÆ,
Orthodoxorum Medicorum Patrono.

QUÆSTIO CHIRURGICA,

QUOD LIBETARIIS DISPUTATIONIBUS,

manè discutienda, in Scholis Medicorum, die Sabbati decimo-sexto
mensis Maii, anno Domini M. DCC. XLIV.

M. ELIA COL DE VILARS, Consiliario Medico Regis
Ordinario in ejus Castelleto, nec-non Saluberrimæ
Facultatis Decano, Doctore Medico, Præside.

Num in refecandis Artubus, carnis segmina reservare, satius?

I.



AUD infrequens humani corporis Artus refecandi necessitas, quæ
cæteræ partes factæ incolumesque servantur. Accidat membrorum
ossibus fractura ἀλφεινδον; eorumdem musculis inflammatio, ar-
teriis nothum aneurysma, superveniatque sphacelus; denegato Am-
putationis auxilio, cita mors occurrit. Insanabilis exedat ossa ca-
ries, vigeat lenta febris, alvi profluvium, macies & alia symp-
tomata ab intus suscepto pure oriunda, donec rescissum sit membrum mali fomes.
Summâ frigoris vi quis corripitur, ita quandoque frigescent extremorum liquida,
ut penitus coacta fuerint atque concreverint; sic desinente eorum cùm intestino tùm
progressivo motu accersitur necrosis; sic in algidis regionibus hyeme plurimi per ni-
vem & glaciem iter facientes, vel in iis pernoctantes, naribus, digitis, pedibus or-
bi facti sunt; & nisi fiderata pars à sanâ maturè sejungatur, brevi serpit, lege circui-
tûs, ad præcordia lethale virus. Cruenta in infesto bello urgeant arma, multi, post
læsos fractosvè Artus, postremo die fata clauderent, ni solers Chirurgus auxiliatrices
porrigeret manus. Porro circa ἀκροτηριασµὸν varii varias instituerunt methodos, inter
quas quam citiorem, tutiorem & jucundiorem comprobantur ratio & experientia,
eam præ cæteris seligere juvat.

A

Q U O citius, tutius & jucundius Chirurgica celebrentur opera, rescindendarum partium structuram callere opera pretium est. Meminerit igitur Chirurgus Femur unico constare osse, totius corporis maximo & longissimo, fistuloso, medullâ referto, antrotrorsum curvo; Crus verò duobus fulciri ossibus, *Tibiâ & Fibulâ*, in utroque extremo simul junctis, in medio dissitis. Primum, quod & *Focile majus* audit, longum est, inordinate triangulum, in medio concavum, medullâ repletum, interiorius situm, in cuius superiore & anticâ parte prominet tuberculum cui musculorum Cruris extensorum tendones annectuntur. Secundum, *Fibula*, scilicet, vel *Focile minus*, Græcis Περὸν, Tibiâ minus, extrinsecus ipsi coextensum est. Articulo Femoris cum Tibiâ mobile apponitur os umbonis figuræ, *Patella* sive *Rotula* nuncupatum; peculiari ligamento, musculorumque tendonibus firmatum. Multi memorata ossa amplectuntur musculi variis exercendis motibus apti nati. Femur præsertim ambiunt anteriùs, interiùs & exteriùs quatuor *extensores*, *Gracilis*, nimirum, *Anterior* vel *Rectus*, *Vastus* cum *internus* tum *externus* & *Cruralis*; sex verò *flexores*, *Biceps*, nempe, *Semi-nervosus*, *Semi-membraceus*, *Gracilis internus*, *Sartorius* & *Popliteus* posticam & internam ejusdem ossis partem potissimum tegunt. Tibiam & Fibulam obvolvunt octo musculi; duo, videlicet, pedis *flexores Tibians anticus* & *Peroneus brevis*, anticam Cruris faciem occupantes; sex autem *extensores*, ambo *Gemelli* sive *Gastrocnemii*, alter *externus*, *internus* alter, *Soleus*, *Plantaris* vel *Gracilis posticus*, *Tibians posterior*, *longus* aut *posticus Peroneus*. Tres primi maximam suræ rolem constituunt, & in validam cedunt Achillis chordam, quos inter, gracili tendone, descendit *Plantaris*. Cæterorum situs ex nomenclaturâ. Adde musciculum *membranaceum*, vulgò *Fasciam latam*, in anteriore & anteriorem Femoris, externamque Tibiæ faciem, membranæ ad instar, expanfam. Nec interosseum ligamentum Tibiam inter & Fibulam intermedium obliviscare. Hos breviter descriptos Artus alluit arteria cruralis, externæ Iliacæ foveles, sub abdominalium musculorum arcum exoriens, in anticâ & ferè internâ ac superiore Femoris parte, Fasciâ latâ & solis tegumentis testâ. Post quinque vel sex transversos digitos iter pergens, mox profundior internam, subindeque sensim posticam, ad poplitem usque, partem legit, solâ hîc adipe & cute cooperata. Hinc bifida *anteriorem* largitur *Tibialem*, ligamentum interossum perforantem, & *Tibialem posteriorem*, à quâ abscedit tertia arteria *Suralis* dicta. In venam Iliacam externam, reducem ab arteriis descriptis cruorem effundit vena cruralis. Nervus tandem cruralis cum arteriâ & venâ ejusdem nominis ex Abdomine egrediens, anteriorem & internam totius Artus partem, Ischiaticus verò posteriorem & externam, furculos hinc inde largiendo, hustrant. Cognitâ sic Femoris & Cruris structurâ, quoties alterutrum rescindere necesse fuerit, hoc opus faciliùs & tutius suscipies,

I I I.

V U L G A R I S rescandi Femoris aut Cruris methodus hæc est. Præmissis omnibus requisitis remediis, instrumentisque, ad id opus idoneis, ordine dispositis, æger in cubilis margine semi-supinus collocatur, in famuli brachiis innixus. Adjutores duo rescindendum membrum, Femur v. g. apprehendunt, firmiterque sustinent, alter, scilicet, partem superiorem, inferiorem alter. Super arteriâ cruralem, infra ejus exortum, linteus imponitur globulus circulari splenio tres digitos lato continendus. Circa hoc splenium injicitur laqueus qui torculari extrinsecus ita constringitur, ut inhibeatur cruoris cursus; mox cute musculisvè, quantum fieri potest, sursum retractis, ad inferiorem Femoris partem alter admovetur laqueus, quò secandæ carnes firmiores stent, & post Amputationem deorsum deprimi, ac truncum faciliùs amplecti possint, nec secatum os longius promineat. Tunc Chirurgus extra membrum situs, cutem & carnes, infra secundum laqueum, cultro falcato, ad os usque in circumfere scindit. Hinc adjutor, splenio semi-fisso, fanas retrahendo carnes sustinet, dum Opifex ferrâ primùm leniter, deinde celeriter, leviter tamen os defecat. Peractâ incisione remittitur torcular, ut exsiliens cruor arteriarum situm indicet. Rursus torcularis ope cohibito sanguine, circa detectas arterias curva utrinque trajicitur acus

ceratum ducens linum, quo hæc vasa ligantur unâ cum quâdam carnis portione, vasorum tunicas, calcitræ ad instar, ab arctiori constrictione fili tutante, interjecto eâdem de causâ duplicem inter nodum spleniolo. Absolutis ligaturis longiora relinquuntur fila, ut extra fasciationem relevari possint & per suppurationem exsolvi. Cum huic operi subjicitur Crus, excisis à Chirurgo, intra Tibias fito, musculus, interosseum ligamentum scalpello recto incidendum venit. Postea serrâ secantur ossa, à crassiori, Tibiâ, scilicet, incipiendo, hinc ambo simul incidendo, ita tamen ut Focile minus prius sit omnino refecatum. His peractis, ossum extremis sicci admoventur plumaceoli, amplumque sectis carnibus linamentum vel nudum, vel pulveratâ terebinthinâ resersum. Soluta inferiori laqueo, cutis & excisi musculi deorsum deprimuntur, truncum, quantum fieri potest, cooperiendi causâ; & ne fursum recedant, duâ super linamentum decussatim applicantur teniæ, quæ emplastro glutinoso illitæ, cuti tenaciter adherent, cruciatisque spleniis continentur. Aptâ demum obvolvitur fasciâ membrum in loco idoneo reponendum. Solvitur interim torcular: at ne superveniat hæmorrhagia, laxeturque fasciatio, adactâ ministri manu, totus per aliquot horas fulcitur apparatus. Hæc de Brachio similiter dicta sint. Verum Amputatione sic celebratâ, diartâ & venæ sectionibus ritè adhibitis, vulnus, nisi intra duos, tres quatuorvè menses, sanari non solet, & præterquam quòd diutius protrahitur curatio, cutis & musculi, elatere suo fursum retrahi perpetuò nitentes, mutilatum membrum, osse prominente, denudatum ferè relinquunt multis obnoxium incommodis. Aliam igitur decurtandorum Artuum methodum inquirere satage, Nullam autem invenies aptiorem eâ, quâ cutis & carnis segmenta, refecato trunco aptanda, supersint.

I V.

EX dicendis tibi manifestò patebit in Artubus refecandis carnis segmîna referre satius esse. Sed ut sis votorum compos, antequam susceperis opus attento animo pendere necessum habeas, utrùm huic ferendo pares sint agri vires; num sphacelo totum afficiatur membrum, aut alio lethali morbo sit corruptum; inutilis siquidem & irrita foret Amputatio; num tandem absque membri jactura succederet sanatio. His itaque consideratè pensatis, excisione statutâ, suo quibusque loco dispositis, præmissisque præmittendis generalibus auxiliis, si Femur v. g. secare necesse fuerit, sic ad opus te accinges. Sanguinis circuitu, torcularis ope, cohibito, adjutores duo membrum firmè contineant. Tunc arrepto manu scalpello recto, septem circiter pollices longo, sex lineas lato, dorso fursum spectante, extrorsum collocatus, mucronem ejus ad os usque adiges, in anteriori Femoris parte ubi secandum est os, quatuor, scilicet, supra genu transversos digitos. Cum os per tigeris, scalpellum in ejus latus inflectendo, posticos quoque musculos & ipsam cutim transiges, deorsumque secando duces instrumentum per digiti transversum longitudinem; mox extrorsum obliquè incidendo, cono simile formabis segmen eâ longitudine cæsum, quâ cum altero fingendo accuratè adaptari possit. Dein adactò similiter scalpello aliud ex altera ossis parte segmen secato. Ambobus segminibus, fissi spleni beneficio, fursum elatis, quod carnis relictum fuerit, ipsimmet Periosteum scalpello incurvo circumcide; os exinde, ut supra, serrâ deseca. Fragmenta, si quæ supersint, *incisoria* Forcepe confestim deme, ne carnes pungant lædantque. Mox ligatis solito more vasis, deflexis infra posteriorem insecturam ligaturarum filis, ac vulnere egelidâ aquâ eluto, segmenta sine mora solerter accommodabis, inter se & truncum ut hæreant. Vulneri secundum ejus longitudinem siccum impones plumaceolum, & latum extremo membri linamentum admovebis, operiendum ac continendum fissis spleniis glutinoso emplastro illitis, quorum extrema cum superiori Femoris parte decussatim conglutinabis, futuræ ad instar siccæ, apparatimque fasciatione idoneâ, & laneo vel coriaceo firmabis pileolo. Truncum tandem, admotâ ministri manu, per aliquod tempus prenti curabis, ut intimiùs inhærescant carnes, obturenturque vasa. Denique solvatur torcular. Eadem methodo fiat Cruris Amputatio, servatis in superiore corollario prædictis cautionibus. At deficientibus in anteriori parte musculis, tegumentis hic

transversim sectis, ad utrumque latus segmina fieri juvat; haud prætermittâ inter-
osseæ ligamenti accuratâ sectione. Quidam unicum ponê Tibiam & Fibulam casum
segmen sufficere autumant; hos nec in Cruris, nec in Brachii decurtatione vituperan-
dos censemus. Iis omnibus ex arte adhibitis, solitâ & idoneâ curatione institutâ,
diartâ & venæ sectionibus non omisis, latus videbis intra decimum octavum præter
propter diem integram vulneri supervenire sanationem.

V.

JAM nunc dubius & anceps hærebis utrûm hæc decurtandorum Artuum ratio
sit vulgari præponenda? Perpende quot inde sint ægris emersura commoda.
1°. Quidem multò citior est sanatio, imò nullâ superveniente ossis exfoliatione;
cûm ex vulgari methodo ad tres quatuorve menses aut ampliùs curatio protraha-
tur, relictis plerumque ulceribus curatu difficillimis, quorum in sanguinem re-
fluens pus febrem lentam, diarrhoeam, marasum, ipsamque mortem producere
pote est. Adde quod collisus nonnumquam renovetur ulcus. 2°. Aptè repositâ
segmina sibi & ossi facili negotio cohærent, truncum obvolvunt, operiunt; sicque
reservata caro mutilatæ parti pulvinaris loco est, & sine molestia, Crure amputa-
to, artificialis Cruris ope, incedere, currere, genu flectere & extendere pro lu-
bitu valet æger. Contrâ aliâ rescindendi ratione secatum os neutiquam tegunt muscu-
li, quin sæpè sæpiùs extra carnes longè prominet, non parvum incommodum gres-
sui daturum. At inquires *διποτηριασμός* per insitionem institui minimè videtur quin gan-
grenæ, vel saltem periculosæ suppurationi detur ansa; abscessûs quippè carnes non
ita sibi invicem & mutilato trunco cohærent, nec conglutinari possunt, nisi spa-
tium quoddam relinquatur excipiendis aptum stillantibus liquidis, mox stagnatu-
ris & brevè corruptelam suscepturis. Verûm si ad promptum illud & mirandum
naturæ opus attendas in partibus sibi invicem agglutinandis, licet à se longè dif-
fisis, in restituendis v. g. leporinis labiis, etiam maximè distantibus, in resar-
ciendis decurtatis naribus &c, omnis facile vanescet metus, modò vulnerata re-
center labra sanguine madentia & sana, ad invicem proximè jungantur, ac ido-
neæ fasciationis beneficio, & comprimente famuli manu, probè conjuncta serven-
tur. Urgebis an non obstaculo erunt excrescentiæ seu exostoses quæ in homine ve-
geto observantur aliquandò è trunco emergere? Succus enim nutritivus ex ossibus sectis
perpetuò defluens, hæc producere potis est excrescentias quæ conservatam car-
nem pungendo, incedentî nocivæ admodum forent. Respondemus accurato appa-
ratu apprimâ tenacæ huic incommodo præcaveri. Solutis igitur prædictis difficul-
tibus; consideratis verò commodis ex proposita methodo oriundis, nulla sequen-
tî potior conclusio.

Ergo in rescandis Artubus, carnis segmina reservare, satius.

DOMINI DOCTORES DISPUTATURI.

M. Theodorus Baron.

*M. Andreas Cretwel, Regiæ So-
cietatis Londanensis Socius.*

*M. Benjamin-Ludovicus Lucas de
Laurent.*

M. Leander Peaget.

*M. Ludovicus-Alexander Vicillard,
Pharmacæ Professor.*

*M. Ludovicus-Guillelmus le Mo-
nier, è Regiâ Scientiarum Aca-
demiâ.*

M. Thomas-Bernardus Bertrand.

M. Camillus Falconet.

*M. Hyacinthus-Theodorus Baron,
Antiquus Facultatis Decanus.*

Proponebat Parisiis PETRUS CHEVALIER, Rhedonæus, Saluberrimæ
Facultatis Medicinæ Parisiensis Baccalaureus, A. R. S. H. 1744.
à sextâ ad meridiem.